



Broj/Број: 03/1-50-1-9-26/08
Sarajevo/Сарајево, 10.9.2008.godine

Z A P I S N I K

26. sjednice Zajedničke komisije za odbranu i sigurnost BiH Parlamentarne skupštine BiH, održane 10. 9. 2008., u vremenu od 11 do 13 sati

Sjednici su prisustvovali članovi Zajedničke komisije: Branko Zrno, Šefik Džaferović, Slobodan Šaraba, Jozo Križanović, Hazim Rančić, Mirko Okolić, Sulejman Tihić, Ivo Miro Jović i Adem Huskić.

Odsustvo sa sjednice opravdali su: Drago Kalabić, Dušanka Majkić i Vinko Zorić.

Sjednici su prisustvovali i gosti, kao i predstavnici Sekretarijata Parlamentarne skupštine BiH:

- Tarik Sadović, ministar sigurnosti BiH,
- Selmo Cikotić, ministar odbrane BiH,
- Marina Pendeš, zamjenik ministra odbrane BiH,
- Ermin Pešto, Ministarstvo sigurnosti BiH,
- Muhamed Smajić, Ministarstvo odbrane BiH,
- Ranko Ninković, Predsjedništvo BiH,
- Dragiša Mekić, Ministarstvo vanjske trgovine i ekonomskih odnosa BiH,
- Nijaz Čardaklija, Ministarstvo vanjskih poslova BiH,
- Dušan Zoller i Christian Haupt, Misija OSCE-a u BiH,
- Mudžahid Hasanbegović, EUSR,
- Jelena Despot, OHR,
- Jasmin Pobrić i Lejla Hadžihasanović, NATO HQ,
- Vesna Willis, EUPM,
- Dragica Hinić, sekretar, i Jovica Katić, stručni saradnik u Zajedničkoj komisiji za odbranu i sigurnost BiH.

Sjednicom je predsjedavao **Branko Zrno**, predsjedavajući Zajedničke komisije za odbranu i sigurnost BiH.

Branko Zrno predložio je da se iz dnevnog reda briše 4. tačka koja se odnosi na razmatranje Prijedloga zakona o programu zaštite svjedoka u BiH, s obzirom da je Zajednički kolegij oba doma Parlamentarne skupštine BiH utvrdio nadležnost ustavnopravnih komisija po ovom zakonu. Prijedlog Branka Zrne za izmjenom dnevnog reda prihvaćen je jednoglasno, kao i sljedeći

DNEVNI RED

1. Usvajanje zapisnika 24. i 25. sjednice Zajedničke komisije;
2. Razmatranje Prijedloga zakona o kontroli kretanja oružja i vojne opreme, prva komisijska faza (predlagač: Vijeće ministara BiH);

3. Razmatranje Prijedloga zakona o graničnoj kontroli, prva komisijska faza (predlagač: Vijeće ministara BiH);
4. Razmatranje Izvještaja o učešću pripadnika Oružanih snaga, policijskih i državnih službenika BiH u operacijama podrške miru za period od 1.9.2007. do 29.2.2008. (predlagači: Predsjedništvo BiH i Vijeće ministara BiH);
5. Razmatranje Izvještaja o provođenju tranzicije za juli 2008. (sačinilac: Ministarstvo odbrane BiH);
6. Razmatranje Informacije u vezi s pripremom i izvođenjem vojne vježbe „Združeni napor 2009.“ (sačinilac: Ministarstvo odbrane BiH);
7. Razmatranje informacija o prodaji oružja Gruziji (podnosilac: Ministarstvo vanjske trgovine i ekonomskih odnosa BiH);
8. Tekuća pitanja:
 - a) Informacija o sastanku članova Zajedničke komisije s komandantom Štaba NATO-a u BiH generalom Richardom Vightmanom i pravnim savjetnikom Bruceom McLaneom, 27. 8. 2008.;
 - b) Informacija o sastanku članova Zajedničke komisije s Nj.E. Joachimom Schmidtom, ambasadorom SR Njemačke u BiH, 2.9. 2008.;
 - c) Poziv G.Marshall centra na Konferenciju o nasilnom ekstremizmu u Evropi, od 5. do 7. 11. 2008., u Njemačkoj (Garmisch-Partenkirchen);
 - d) Informacija o posjeti delegacije koju čini 27 ambasadora članova Političko-sigurnosnog komiteta Vijeća Evropske unije.

Ad. 1. Usvajanje zapisnika 24. i 25. sjednice Zajedničke komisije

Zajednička komisija jednoglasno je usvojila zapisnike 24. i 25. sjednice.

Ad. 2. Razmatranje Prijedloga zakona o kontroli kretanja oružja i vojne opreme, prva komisijska faza (predlagač: Vijeće ministara BiH)

Branko Zrno naglasio je da se već četvrti put razmatraju principi Prijedloga zakona o kontroli kretanja oružja i vojne opreme pred Zajedničkom komisijom, te da je u prethodnom periodu rasprava obavljena do kraja. Zato je svu daljnju raspravu o Zakonu, ukoliko ona nešto ne mijenja, ocijenio nepotrebnom. Istakao je da je neposredno prije početka sjednice članovima Komisije podjeljen akt od Ministarstva sigurnosti BiH vezan za ovaj zakon. Zaključio je da Komisija i danas raspravlja o principima Zakona, te pitao predstavnike Ministarstva sigurnosti BiH u kojoj mjeri bi dostavljeni prilog mogao promijeniti dosadašnje stavove članova Komisije prema Zakonu.

Mirko Okolić također je upitao predstavnike Ministarstva sigurnosti BiH da li je od prošle sjednice do danas išta urađeno na realizaciji zaključka Zajedničke komisije kojim je zatraženo dodatno usaglašavanje teksta ovog zakona. Iz materijala koje je, neposredno pred početak sjednice, dostavilo Ministarstvo sigurnosti BiH ne može se lako uočiti da li se na osnovu tih prijedloga mogu prihvatiti principi Zakona.

Tarik Sadović potvrdio je stav da su poznate sve činjenice vezane za ovu tačku dnevnog reda. Materijal koji je podijeljen pred početak sjednice predstavlja Poglavlje 3. tzv. Izmjene 25 Uputstava stranama koje je EUFOR podnio vlastima u BiH, a u kojem se naglašava da EUFOR namjerava prenijeti ovlaštenja po ovom pitanju na bosanskohercegovačke vlasti. Podsjetio je da je na izradi ovog zakona radila Radna grupa sa zadatkom da nađe kompromisno rješenje. Istakao je da mu nije jasno kako se mogu osporiti principi ovog zakona, osim ako nisu u pitanju određeni politički stavovi. Na kraju je zamolio da se prihvate principi ovog zakona, s obzirom da oni nisu sporni, te da se u drugoj fazi amandmanski djeluje i eventualno popravljaju njegov tekst.

Nakon diskusije ministra Sadovića, Mirko Okolić zaključio je da se ništa suštinski važno nije desilo od posljednje sjednice kada je razmatran ovaj zakon.

Jozo Križanović također je potvrdio da Komisija raspravlja o Zakonu već četvrti put, te da stoga neće ništa novo reći. Ovim zakonom prenosi se nadležnost s EUFOR-a na institucije vlasti Bosne i

Hercegovine i zato ga čudi negativan stav onih političkih stranaka koje se zalažu za odlazak predstavnika međunarodne zajednice iz BiH. Zato nema razloga da se ne usvoje principi.

Šefik Džaferović naglasio je da su svi članovi Komisije posljednji put dobili pismo predstavnika međunarodne zajednice u BiH, u kojem je iznesen njihov usaglašen stav i rješenja po ovom pitanju, te naveo da Komisija po njihovom sudu treba odlučiti. Pitao da li je moguće da Komisija kao kompromisno prihvati rješenje koje su predložili predstavnici međunarodne zajednice. Zaključio je da će, ako Komisija ne usvoji ovaj zakon, EUFOR u BiH zauvijek obavljati ovaj dio posla. Predložio je članovima Komisije da još jednom razmisle o Prijedlogu zakona, te da se glasanje o njemu odgodi za sljedeću sjednicu.

Adem Huskić podržao je diskusije Križanovića i Džaferovića. Kao najvažniji princip istakao je prijenos nadležnosti s EUFOR-a na domaće institucije vlasti. Paradoksalnom je istakao činjenicu da određeni političari iz Republike Srpske zastupaju tezu kako se bošnjački predstavnici zalažu za opstanak međunarodne zajednice u BiH, a zatim ne žele podržati principe ovog zakona. Zato je zatražio da se glasa o principima Zakona, ističući da ih treba prihvatiti.

Mirko Okolić podržao je prijedlog Džaferovića da se prolongira glasanje o ovom zakonu. Rekao je da su predstavnici iz RS-a saglasni s prijenosom ovlaštenja na domaće institucije vlasti, ali je naveo da je u BiH neophodan dogovor svih stana na koji način to treba uraditi. Kao indikativnu činjenicu istakao je da se principi ovog zakona po četvrti put nalaze pred Komisijom, te rekao da su slične okolnosti postojale i nedavno, kada su usvajani zakoni o policijskim strukturama u BiH. Složio se s tim da ovaj zakon treba što prije donijeti, ali i istakao da je do danas bilo dovoljno vremena da on prođe cijelu parlamentarnu proceduru. Zaključio je da i on želi prijenos ovlaštenja s EUFOR-a, ali uz potrebu usaglašavanja svih dosadašnji stavova o ovom zakonu.

Jozo Križanović kratko je replicirao prethodniku, navodeći da shvata ovakvu ideju, ali u njoj ne vidi ništa novo što bi dovelo do usvajanja Zakona, te izrazio sumnju da se neće ništa novo postići u odnosu na prethodne rasprave u protekla dva mjeseca.

Branko Zrno odgovorio je potom da principi Zakona na ovoj sjednici najvjerojatnije neće biti usvojeni, ali da će se prolongiranjem odlučivanja eventualno otvoriti mogućnost za njegovo usvajanje na narednoj sjednici, podržavajući pritom prijedlog Šefika Džaferovića. Predložio je da se zaduže predstavnici Ministarstva sigurnosti BiH da, u koordinaciji s predstavnicima Zajedničke komisije za odbranu i sigurnost BiH, izvrše konsultacije u vezi s dostavljenim dopisom međunarodne zajednice u BiH, te o obavljenoj aktivnosti na narednoj sjednici daju konkretan prijedlog rješenja ovog problema, kako bi potom na istoj sjednici principi Zakona bili eventualno prihvatljivi.

Ivo Miro Jović također je podržao prijedlog Šefika Džaferovića. Prijedlog ovog zakona je u njegovim početnim fazama smatrao dobrim, dok je u narednom periodu ovaj zakon izgubio svoju ustavnost, s obzirom da u svojim odredbama ne pominje kantonalna ministarstva unutrašnjih poslova, koja postoje u skladu sa ustavnim uređenjem BiH. Zaključio je da se ova ministarstva, prilikom korekcije postojećeg teksta zakona, moraju ugraditi u tekst Zakona.

Branko Zrno je, nakon rasprave, formulirao je **zaključak** koji je prethodno predložio Džaferović. Ovim zaključkom se od kolegija oba doma Parlamentarne skupštine BiH traži produženje roka od 20 dana za odlučivanje o ovom zakonu, a od Ministarstva sigurnosti BiH traži se da u istom roku, uzimajući u obzir dopis predstavnika međunarodnih institucija u BiH i druge do sada dostavljene materijale s kojima raspolaže, provede potrebne konsultacije o ovom zakonu s članovima Zajedničke komisije za odbranu i sigurnost BiH i drugim relevantnim činiocima, te u skladu s tim na narednoj sjednici predloži konkretno rješenje.

Prijedlog ovog zaključka usvojen je sa 8 glasova „za“, bez glasova „protiv“ i jednim „suzdržanim“ glasom.

Ad. 3. Razmatranje Prijedloga zakona o graničnoj kontroli, prva komisijska faza (predlagač: Vijeće ministara BiH)

Branko Zrno predložio je da članovi Komisije ne raspravljaju ni o ovom zakonu, te predložio da se i na njega primijeni isti zaključak kao u prethodnoj tački.

Članovi Komisije prihvatili su ovaj prijedlog, te su, sa sedam glasova „za“, bez glasova „protiv“ i uz dva „suzdržana“ glasa, usvojili predloženi zaključak.

Ad. 4. Razmatranje Izvještaja o učešću pripadnika Oružanih snaga, policijskih i državnih službenika BiH u operacijama podrške miru za period od 1.9. 2007. do 29. 2. 2008. (predlagači:Predsjedništvo BiH i Vijeće ministara BiH)

Branko Zrno ocijenio je Izvještaj u cjelini prihvatljivim, ali je i istakao da u on sadrži određene nedostatke. Predložio je potom da Zajednička komisija usvoji ovaj izvještaj, ali bez njegovog dijela prikazanog u tačkama 7. i 8., koje se odnose na nove misije BiH u Sudanu i Afganistanu. Za ove misije potrebno je da Predsjedništvo BiH i Vijeće ministara BiH prethodno donesu odluke o učešću. Kao drugu primjedbu naveo je činjenicu da ubuduće prijedlog nastavka djelovanja pripadnika BiH u mirovnim misijama za 2009. godinu Zajednička komisija treba dobiti najkasnije do kraja septembra ove godine.

Mirko Okolić također je sugerirao da se Izvještaj ne dostavlja s ovolikim zakašnjenjem, navodeći da je ovaj izvještaj završen 14. 7.2008., a obuhvata period do kraja februara ove godine, te naveo da su se u tom vremenu mogle desiti određene promjene. Zato je kao razuman vremenski period za dostavljanje narednog izvještaja predložio rok od 60 dana od dana isteka izvještajnog perioda, smatrajući da je to dovoljno vremena za njegovu izradu i dostavu u parlamentarnu proceduru.

Selmo Cikotić podržao je diskusiju Mirka Okolića, ali je naveo da ovaj izvještaj sačinjava Interresorna radna grupa, koju čine i predstavnici drugih ministarstva, te zaključio da se najviše vremena izgubi prilikom objedinjavanja svih podataka unutar te radne grupe.

Ivo Miro Jović sugerirao je da se u budućim izvještajima, radi bolje preglednosti, metodologija njegove izrade promijeni u smislu da se tabelarno prikaže gdje sve učestvuju pripadnici BiH u operacijama podrške miru.

Marina Pendeš saglasila se sa diskusijom Ive Mire Jovića, te navela da bi za izmjenu metodologije pravljenja izvještaja trebalo obavezati Ministarstvo vanjskih poslova BiH, koje je nosilac aktivnosti u ovoj radnoj grupi.

Nakon rasprave, Komisija je jednoglasno, sa devet glasova „za“, bez dijelova u tačkama 7. i 8. koje je istakao Branko Zrno, usvojila Izvještaj o učešću pripadnika Oružanih snaga, policijskih i državnih službenika BiH u operacijama podrške miru za period od 1. 9. 2007. do 29. 2. 2008.

Komisija je također usvojila i **zaključak** kojim se od nadležnih institucija zahtijeva dostavljanje izvještaja o učešću pripadnika Oružanih snaga, policijskih i državnih službenika BiH u operacijama podrške miru u roku od 60 dana od dana isteka izvještajnog perioda.

Ad. 5. Razmatranje Izvještaja o provođenju tranzicije za juli 2008. (sačinilac: Ministarstvo odbrane BiH)

Ivo Miro Jović pohvalio je ovaj izvještaj, sugerirajući da se nastavi s ovakvom praksom.

Branko Zrno postavio je načelno pitanje u vezi s viškom naoružanja u BiH, tražeći da Ministarstvo odbrane BiH konačno i definitivno utvrdi sve viškove naoružanja i o tome da ocjenu i informira Zajedničku komisiju. Ta informacija treba prikazati količinu i način čuvanja naoružanja, brojnost snaga angažiranih na njegovom čuvanju, te konačno odgovor da li se radi o ekonomski isplativom projektu. Ta ocjena treba da odgovori na pitanje i koliko čuvanje viška naoružanja košta Bosnu i Hercegovinu, odnosno ukoliko se to naoružanje proda, koliko će se zaraditi i ko će taj novac dobiti - država ili entiteti. Naveo je i da se UNDP, kao međunarodna organizacija koja radi na ovom projektu za uništavanje viška naoružanja, izdvaja blizu 3 miliona eura, te da se sada trenutno radi na osposobljavanju još 4-5 kapaciteta za uništavanje viška naoružanja. Mišljenja je da bi sljedeći ovakav izvještaj morao sadržavati sva ova pitanja.

Selmo Cikotić naveo je da je u okviru Ministarstva odbrane BiH u toku realizacija Sporazuma o raspolaganju pokretnom imovinom. Rok za popis ove pokretne imovine je osam mjeseci, o čemu će Komisija dobiti i pisanu informaciju. Na osiguranju pokretne imovine angažira se oko 1/10 ukupnog aktivnog profesionalnog vojnog sastava. Prilikom sravnjivanja datoteka, gdje je posao trebalo da bude završen još 2006. godine, naišlo se na određene razlike, zbog čega je naređeno još

jedno sravnjivanje svih datoteka, zbog čega je proces dodatno usporen. Ocijenio je da će u vrlo kratkom roku imati sređene sve navedene podatke, te da će oni nakon toga biti proslijeđeni Predsjedništvu BiH i Parlamentarnoj skupštini BiH, odnosno Zajedničkoj komisiji. Naveo je još i da je Sporazumom predviđeno da se svi viškovi naoružanja rješavaju njihovom prodajom, donacijom ili uništenjem, te naglasio da ne mora značiti da će se one stavke koje su naznačene za prodaju na kraju i prodati. Proces uništenja nestabilne municije je u toku i ne postoji nijedna lokacija koja je sigurnosno ugrožena. Istakao je da od prodaje naoružanja i vojne opreme 80 % sredstava ide u korist entiteta, koji će ovim sredstvima finansirati određene ranije dugove entitetskih oružanih snaga, dok država dobiva 20 % tog iznosa. Čitav proces odvijat će se sukcesivno i pri tome će svaki naredni korak odobravati Predsjedništvo BiH. U cijelom ovom procesu entitetske vlade imat će po dva predstavnika, a njegov dio bit će i NATO, EUFOR, te Misija OSCE-a u BiH. I članovi Zajedničke komisije za odbranu i sigurnost dobrodošli su ukoliko se žele uključiti u ovaj proces, te obavljati aktivniji nadzor nad njegovim provođenjem.

Jozo Križanović konstatirao je da se radi o Izvještaju za juli, te s obzirom da će se o provođenju tranzicije razgovarati svaki mjesec, upitao da li je bilo napretka na ovom polju tokom augusta.

Hazim Rančića zanimalo je da li će početi aktivnosti Vijeća ministara BiH i Ministarstva odbrane BiH, kao i drugih institucija u pogledu rješavanja pitanja iz Sporazuma o sukcesiji bivše SFRJ, s obzirom da BiH u skladu s tim ima određena prava.

Odgovarajući na pitanje Križanovića, **Selmo Cikotić** istakao je da je bilo napretka u augustu, s obzirom da se u vezi s određenim stavkama realizacije Sporazuma (donacija, prodaja, uništenje) angažira više radnih grupa nego do sada. Odgovarajući na pitanje Rančića, naveo je da je osnovana komisija Vijeća ministara BiH, koja je sačinila program rada, te da su u toku pripreme aktivnosti.

Nakon rasprave, Komisija je jednoglasno, sa devet glasova „za“, usvojila Izvještaj o provođenju tranzicije za juli 2008. godine.

Ad. 6. Razmatranje Informacije u vezi s pripremom i izvođenjem vojne vježbe

"Združeni napor 2009."

(sačinilac: Ministarstvo odbrane BiH)

Branko Zrno zahvalio se podnosiocu na dobro pripremljenoj informaciji s njihove strane, te naglasio da je ista informacija tražena i od Ministarstva sigurnosti BiH i Ministarstva vanjskih poslova BiH, ali da Komisija do danas od njih još ništa nije dobila.

Marina Pendeš navela je da je Ministarstvo odbrane BiH predvidjelo značajna finansijska sredstva za izvođenje ove vojne vježbe, te u tom smislu očekuju podršku Zajedničke komisije prilikom rasprave o Prijedlogu budžeta za 2009. godinu.

Selmo Cikotić istakao je da je vježba „Združeni napor“ prva vježba NATO-a na teritoriji zemlje koja nije punopravna članica NATO-a, cijeneći to velikim uspjehom Bosne i Hercegovine i izrazom sposobnosti da izvede jednu ovakvu aktivnost. Naveo je da se tom prilikom moraju osigurati svi mehanizmi kontrole jedinica koje će se kretati ka Banjoj Luci. U tom smislu ocijenio je da se u ovaj projekat treba uključiti i Mnistarstvo sigurnosti BiH, kao i drugi predstavnici insitucija BiH.

Branko Zrno predložio je da Komisija ovu informaciju primi k znanju, te da ponovo uputi zahtjev za kontinuiranu dostavu informacija o ovom pitanju Ministarstvu sigurnosti BiH i Ministarstvu vanjskih poslova BiH, te od njih zahtijeva uključivanje u navedene aktivnosti.

Članovi Komisije su jednoglasno, s devet glasova „za“, prihvatili prijedlog Branka Zrne.

Ad. 7. Razmatranje Informacija o prodaji oružja Gruziji (podnosilac: Ministarstvo vanjske trgovine i ekonomskih odnosa BiH)

Branko Zrno upoznao je članove Komisije da je Ministarstvo vanjske trgovine i ekonomskih odnosa BiH dostavilo Informaciju koja na sebi ima oznaku „povjerljivo“, te ukazao na odredbe poslovnika oba doma Parlamentarne skupštine BiH kada je u pitanju ovakav materijal. Ove odredbe podrazumijevaju isključivanje javnosti sa sjednice. Ipak, upitao je predstavnika ovog ministarstva da li se prilikom pravljenja ove informacije moglo izbjeći stavljanje navedene oznake, cijeneći da bi rasprava bila mnogo produktivnija kada ove oznake ne bi bilo na ovoj informaciji.

Dragiša Mekić, predstavnik Ministarstva vanjske trgovine i ekonomskih odnosa BiH, pojasnio je da je oznaka „povjerljivo“ stavljenja radi određenih pitanja po ovoj informaciji, te potvrdio da je informaciju sličnog sadržaja ovo ministarstvo podijelilo i medijima.

Branko Zrno potom je zamolio ostale učesnike, koji nisu članovi Komisije ni predstavnici Sekretarijata Komisije, kao i sve one koji nisu prošli proces sigurnosne provjere, da napuste sjednicu tokom rasprave o ovoj tački. Osim članova i predstavnika Sekretarijata Zajedničke komisije za odbranu i sigurnost, u sali su ostali još ministar odbrane BiH Selmo Cikotić, zamjenik ministra odbrane Marina Pendeš, te predstavnik Ministarstva sigurnosti BiH Ermin Pešto i predstavnik Ministarstva vanjske trgovine i ekonomskih odnosa BiH Dragiša Mekić. Sva ova lica prošla su postupak sigurnosne provjere.

Branko Zrno informirao je prisutne da je odlučio zatražiti ovu informaciju zbog povećanog interesa medija posljednjih dana, te zaključio kako se rasprava o ovoj temi treba obaviti i okončati na ovoj sjednici Komisije. Zahvalio se Dragiši Mekiću na ovoj informaciji ocjenjujući je kao potpuno jasnu.

Mirko Okolić naveo je da bi, s obzirom na oznaku povjerljivosti, volio znati ko stoji iza ove informacije. Istakao je da ne vidi razlog zbog čega ova informacija treba da nosi tu oznaku, jer ona na sebi nema ni ime i ni prezime lica koje je podnosi, ni njegov potpis ni dužnost koju obavlja, niti bilo kakav drugi vid zaštite.

Dragiša Mekić pojasnio je da je autor ove informacije sektor unutar Ministarstva kojim on rukovodi, te rekao još da su identičnu informaciju, s potpisom ministra, uputili Predsjedništvu BiH i Vijeću ministara BiH. Složio se s konstatacijom da je i Zajednička komisija Informaciju trebalo da dobije s potpisom ministra, ali je naglasio da je ona došla u ovoj formi zbog nedostatka vremena, kako bi članovi Komisije s njom bili upoznati i o njoj mogli raspravljati. Istakao je da Ministarstvo posjeduje međunarodne tovarne listove, carinske deklaracije, te podatke koliko je čega izvezeno. Kompletan proces se kontrolira. Istakao je da mu kod medijskog prikazivanja ovog slučaja smeta to što mu se čini da ovo predstavlja udar na našu vojnu industriju. Naveo je kako je sličnih izvoza bilo i od strane susjednih zemalja, Srbije i Hrvatske, ali tada niko nije medijski napadao vojnu industriju. BiH je na ovom polju usvojila zakone i provodi ih u skladu sa zakonima Evropske unije. Sve dozvole prikazane su u Izvještaju koje je Ministarstvo napravilo za 2006. godinu. Evropska komisija je BiH skinula sve sankcije u ovoj oblasti 2006. godine i svi se izvještaji dostavljaju potpuno transparentno. Ove izvještaje, uz pomoć Vlade SAD-a, prave još od 2004., a poređenja radi Hrvatska i Srbija su tek ove godine prvi takav izvještaj prikazale javnosti.

Adem Huskić upitao je da li je moguće da Komisija dobije informaciju o tome šta je realizirano tokom 2008. godine, na šta je Mekić odgovorio da to nije moguće jer je rok za implementaciju dozvola godinu dana.

Jozo Križanović naglasio je da je suština rada Zajedničke komisije nadzor nad zakonitošću rada institucija vlasti koja se bave pitanjima iz oblasti sigurnosti i odbrane. Iz ove informacije vidi se da su svi elementi ispoštovani, te je u tom smislu izrazio svoje zadovoljstvo poštivanjem zakona. Zamolio je da ubuduće na sličnim informacijama, koje su već predstavljene medijima, ne stoji oznaka povjerljivosti. Upitao je potom za dio Informacije koji je prikazan na 3. stranici, a odnosi se na izvoza oružja Gruziji iz Novog Travnika i „Pretisa“ iz Vogošće.

Odgovarajući na njegovo pitanje, Dragiša Mekić rekao je da se u tom slučaju radi o tri dozvole koje su date a nisu iskorištene, što se dovodi u kontekst s „orkanima“ koji su dovezeni, ali nisu iskorišteni.

Mirko Okolić konstatirao je da ova informacija nije ni bila potrebna, ali da je svjestan da je pred Zajedničku komisiju došla pod pritiskom javnosti. Mišljenja je da se neće s ovom sjednicom završiti priča o ovoj informaciji. Naveo je da njega lično ova informacija, u smislu otklanjanja

određenih sumnji, ne može zadovoljiti. U ovom slučaju ostalo je nejasno koja će institucija odgovoriti da li je nešto zaista izvezeno u Gruziju ili nije, i ako jeste - šta je izvezeno. Podatke iznesene u Informaciji ocijenio je paušalnim.

Branko Zrno naveo je da nije razumio pitanja Mirka Okolića, s obzirom da ova informacija predstavlja nastavak redovnih informacija koje Zajedničkoj komisiji dostavlja Ministarstvo vanjske trgovine i ekonomskih odnosa BiH i u okviru nje se nalaze svi potrebni podaci. Ukoliko bi Komisija sada ušla u problem rada bh. medija i njihovu dobronamjernost, to bi bio uzaludan posao. Stoga, Informacija nije bila iznuđena, već je ona zatražena samo radi informiranja članova Zajedničke komisije s ovim problemom, a ne radi novinara.

Sulejman Tihčić zaključio je da iz ove informacije jasno proizilazi da je izvoz naoružanja pod kontrolom i u skladu sa zakonom. Iza ove informacije stoje nadležna ministarstva i zadatak Zajedničke komisije je da se njenim usvajanjem otklone sve špekulacije. Istina je da ovakvu informaciju treba potpisati ministar, ali su u ovoj raspravi navedeni jasni razlozi zašto je on nije potpisao. Zato Komisija treba usvojiti ovu informaciju.

Selmo Cikotić istakao je da ovo pitanje treba biti riješeno između Parlamentarne skupštine BiH i izvršne vlasti u BiH, te da su oni kao predstavnici izvršne vlasti tu da odgovore na pitanja o eventualnim spornim stvarima. Potvrdio je da u okviru Ministarstva odbrane BiH i Oružanih snaga BiH nije napravljena nijedna protupravna radnja kojom bi bili dovedeni u pitanje propisi kojima se regulira ova oblast ili napravljena neka greška, s obzirom da je nekoliko državnih institucija kontroliralo cjelokupan proces.

Mirko Okolić istakao je kako i on želi da vjeruje da je u ovom slučaju sve onako kako se predstavlja. Ipak je zaključio da je Ministarstvo vanjske trgovine i ekonomskih odnosa BiH imalo vremena i ranije ovu informaciju dostaviti Zajedničkoj komisiji, te sugerirao da se Informacija ne usvaja nego samo primi k znanju.

Branko Zrno zaključio je potom raspravu i istakao da će Komisija svakako Informaciju primiti k znanju. Zaključio da je iz rasprave sve jasno, da nema ništa sporno i da je sada na Komisiji da odbrani zakonitost rada institucija BiH.

Zajednička komisija za odbranu i sigurnost primila je k znanju Informaciju o prodaji oružja Gruziji.

Ad. 8. Tekuća pitanja

- a. Informacija o sastanku članova Zajedničke komisije s komandantom Štaba NATO-a u BiH generalom Richardom Vightmanom i pravnim savjetnikom Bruceom McLaneom, 27. 8. 2008.**

Zajednička komisija primila je k znanju Informaciju o sastanku s komandantom Štaba NATO-a u BiH generalom Richardom Vightmanom i pravnim savjetnikom Bruceom McLaneom, održanim u Sarajevu, 27.8. 2008.

- b. Informacija o sastanku članova Zajedničke komisije s Nj.E. Joachimom Schmidtom, ambasadorom SR Njemačke u BiH, 2. 9. 2008.**

Zajednička komisija primila je k znanju Informaciju o sastanku s Nj.E. Joachimom Schmidtom, ambasadorom SR Njemačke u BiH, održanom u Sarajevu 2.9.2008.

- c. Poziv G.Marshall centra na Konferenciju o nasilnom ekstremizmu u Evropi, od 5. do 7. 11. 2008., u Njemačkoj (Garmisch-Partenkirchen)**

Zajednička komisija donijela je odluku da niko od njenih predstavnika neće prisustvovati Konferenciji George Marshall centra o nasilnom ekstremizmu u Evropi, koja će, od 5. do 7. 11.2008., biti održana u Garmish-Partenkirchenu u Njemačkoj.

d. Informacija o posjeti delegacije 27 ambasadora članova Političko-sigurnosnog komiteta Vijeća Evropske unije

Dragica Hinić informirala je članove Komisije da će, 18. 9. 2008., u vremenu od 13,30 do 15 sati Zajedničku komisiju posjetiti delegacija od 27 ambasadora članova Političko-sigurnosnog komiteta Vijeća Evropske unije, te zamolila članove Komisije da učestvuju u ovom sastanku.

Komisija je odlučila da ovom sastanku prisustvuju: Šefik Džaferović, Slobodan Šaraba, Mirko Okolić, Adem Huskić i Jozo Križanović.

Zapisnik sačinila
Dragica Hinić

Predsjedavajući
Zajedničke komisije
Branko Zrno